

欽定廓爾喀紀畧

卷二  
十八



欽定廓爾喀紀畧卷二十八

四月二十八日丙寅福康安海蘭察惠齡奏言廓

爾喀賊匪恃其險遠頑梗性成前經鄂輝等發

檄曉諭臣福康安復遵

旨發檄誘降而喇特納巴都爾巴都爾薩野等接奉

兩次檄諭總未稟覆揣度情形竟係賊匪等自

知罪惡貫盈愈思負固不敢親來籲懇乞降且



鄂輝等收復聶拉木時已將官寨屯聚賊匪殲  
戮無遺而濟隴絨轄兩處之賊並未聞風逃竄  
又復添派賊兵前來拒守是賊匪恃強已久志  
驕氣盈將來大兵進勦轉可因其抗拒之堅一  
鼓殲擒首級成鋒大示懲創縱使賊匪扼險防  
備諒不能阻我軍行致稽時日擬俟索倫達呼  
爾各兵及前調各起屯兵到齊勦平邊界屯聚

之賊隨即乘勝深入設將來濟隴等處新添賊  
匪又如前此聶拉木官寨之賊併力固守未能  
立時攻破亦不值曠日持久老我兵力酌擬留  
兵正路聲言進攻牽綴賊匪卽於山嶺重疊賊  
匪不防之處出奇制勝潛兵攀陟越過險阻繞  
至賊後一面派委妥員督兵挈卡安營截其歸  
路一面統率勁旅徑取陽布直搗賊巢出其不



金定原師略 卷二十一  
意使賊匪首尾不能兼顧方可一舉集事現在  
諸神保所帶屯兵二千名已陸續到來索倫兵  
丁前經調派三百名先行來藏茲據岱森保稟  
報現帶兵三百名業至前藏其餘亦可陸續前  
進袁國璜所帶屯兵三千名內德爾格兵丁一  
千名已自察木多起程約計四月杪閏四月初  
間各兵均可到齊卽當統率大兵相機進剿蕩

平賊境

臣等仰蒙

聖恩委以軍旅重任籌畫須出萬全而決機祇在頃  
刻惟俟各兵齊集之日乘勢深入斷不敢藉稱  
持重有誤事機第<sub>臣</sub>等已到後藏一月等待各  
兵或因大雪路遠或因烏拉竭蹶此時尙未到  
齊致遲進剿屢經飛檄催調並專員持令迎催  
實屬萬分焦急敬惟



聖主垂念軍務自必日盼捷音<sub>臣</sub>等俱係受恩深重之人不能早紓

睿慮下懷悚惕時刻難安惟有籲求

聖心稍寬厘注一俟各兵齊集欽遵節次

訓示悉心籌畫力圖上策仰藉

天威定能迅速蕩事

福康安惠齡又奏言<sub>臣</sub>等到後藏時查看扎什

倫布卽將

欽賜冊印現在是否尊藏向歲琿堪布查詢復寄信

班禪額爾德尼及伊親隨喇嘛等詢問查對所

言均屬相符敬查十二輩班禪額爾德尼尊藏

金冊金印一分前輩班禪額爾德尼入

覲蒙

恩特賞玉印上年班禪額爾德尼移駐前藏時將金



金匱要略卷之二十八  
四  
印玉印隨身請往金冊玉冊供奉經樓匆促未  
及請至前藏及賊匪退回查點經樓各物盡已  
搶掠無存金冊玉冊亦經失去旋在經樓房屋  
內尋獲玉冊並未損壞現仍在原處供奉<sub>臣</sub>等  
既已查明卽遵

旨寄知達賴喇嘛班禪額爾德尼此次失去金冊  
大皇帝另爲賞給一分尊藏扎什倫布俾敬悉

聖主衛護黃教之意共知感戴

同日孫士毅奏言

<sub>臣</sub>

查川省屯土兵自金川用

兵以來已及二十年久安耕鑿於衝鋒打仗漸  
不如前此番先後派赴西藏土練共有八千名  
其餘率皆老弱不能得力之人若令前赴軍營  
徒然糜費賞號於事實屬無益且該土練遇有  
派調初次尙屬踴躍迨後亦復漸形觀望及檄



調在途紛紛因病告回爲數甚多卽如此次奉  
調綠營官兵二千五百名計各營距爐或二千  
餘里及一千六七百里不等俱已陸續到爐

臣

分作五起飭令間日行走頭起官兵五百名已

於四月十七日經

臣

點驗出口而瓦寺沃什黨

壩三處土兵距爐較近

臣

屢次委員持令嚴催

至今尙無信息是土兵一項不足調遣此其明

驗至現在出口之官兵

臣

節次飛飭口外各臺

站多備烏拉在站等候一俟官兵到站尅日應  
付前進並嚴切面諭領兵各將備在途加緊趲  
行務須遵照福康安來咨於五月內到藏以資  
攻勦防守毋許稍有遲悞續奉

諭旨飭令再行豫備兵三千名聽候檄調

臣

業已趕

緊照數飭備令將器械等項迅速料理停妥俟



前調官兵出口後卽令豫備之兵三千名陸續  
至爐城駐劄聽候一俟得有福康安咨調信息  
卽可尅日出口較之由內地派調前進更爲迅  
捷如其不用亦可就近遣發回營惟是豫備之  
兵旣多必須大員統領前次續調官兵案內經  
臣奏明令署重慶鎮彭承堯普洱鎮朱射斗分  
起管領今旣有續備之官兵前後共六千名似

未便拘泥前奏令兩鎮同時並發致後起統領

乏員臣一面飭令朱射斗將此次派調之官兵

先行帶領出口其豫備之官兵卽令彭承堯在

爐聽候檄調庶前後統領均有大員軍行益昭

嚴肅如軍營無須再調兵丁卽令彭承堯飛馳

赴藏聽候福康安委用均奏入

上命軍機大臣傳諭福康安海蘭察惠齡孫士毅曰



福康安等奏稱濟隴等處新添賊匪如未能立時  
攻破卽於山嶺重疊之處潛兵越險繞至賊後截  
其歸路一面統兵直搗賊巢一節雖屬暗度出奇  
之策如能斷其糧道是亦一計但福康安等統領  
勁旅聲罪致討係堂堂正正之師濟隴一路旣爲  
進兵正道自應先將該處屯聚賊匪殲滅無遺廓  
清邊界然後力圖進取使我兵鼓勇直前無後顧

之慮方爲正辦若不將濟隴等處逗遛之賊攻剿  
淨盡由此路乘勝直前別尋間道懸軍深入該處  
山路叢雜安保濟隴等處賊匪不心生窺伺擾我  
後路卽賊匪無能計不出此而我兵深入之時尙  
有濟隴等處賊人橫亘於中軍心自不免稍存迴  
顧萬一首尾不能兼應所關非細况自宗喀至濟  
隴一帶現有擦木地方形勢扼要賊匪尙於該處



設卡據守其自濟隴以至陽布必更有險要之處  
賊匪聞大兵進發豈不處處安卡設寨以爲負隅  
抗拒之計我兵焉能徑行越過且濟隴等處係後  
藏邊界地方此時尙未及收復又安必其直搗巢  
穴一舉集事耶福康安海蘭察等久歷戎行素嫻  
韜畧何未見及此卽云濟隴等處有新添賊匪併  
力固守恐未能立時攻破然福康安統率如許勁

兵攻此一隅株守之賊諒不致有稽時日倘或稍  
有耽延亦不過畧遲數日而邊界賊匪悉數殲除  
俾我兵無後顧之慮自必倍加奮勇攻堅破壘爲  
得尺則尺之計若連得幾次勝仗奪取一二處碉  
卡使賊匪望風膽落卽有險要拒守之處亦必紛  
紛瓦解雖蕝事稍遲而成功較爲穩妥此實動出  
萬全良策福康安等現在熟籌進剿必有可恃然



後可進不得存行險僥倖之見也至賊匪接奉兩次檄諭何總無一信若非嚴密設備爲負嶠固守之計卽係自恃險遠並不畏懼官兵故不差人稟覆使我兵無從查其虛實不敢輕進賊匪狡猾伎倆大約不出乎此福康安等益當堅持定見加意慎重斷不可稍涉冒險又十二輩班禪額爾德尼失去金冊現已飭照辦一分遇便賞給扎什倫布

尊藏著福康安先告知達賴喇嘛班禪額爾德尼以示衛護體卹之意又據孫士毅奏現奉諭旨飭令再行豫備兵三千名業已照數飭備俟前調之官兵出口後卽令陸續至壩城駐劄聽候遣調等語屯土兵丁先後派赴西藏者已有八千餘名所剩俱係老弱無用自應卽於川省綠營官兵內就近挑取照數豫備但現在索倫達呼爾兵及前調川



兵三千名想俱陸續抵藏合之從前派調之兵已  
有一萬三千名兵力不爲不多此項豫備兵三千  
名福康安是否尙須檄調亦在未定著諭孫士毅  
卽飭令帶領將弁等赴爐駐劄聽候一俟福康安  
咨調信息到日卽令尅期起程赴藏以期早到一  
日卽軍營早收一日之用

同日福康安又奏言竊臣欽奉

諭旨以從前巴忠會奏及達賴喇嘛人甚老實與人

談論俱不能明晰一木訥無能之人於衛藏事務

恐難料理裕如卽前日召見都司嚴廷良詢問達

賴喇嘛爲人所奏與巴忠大概相同等因臣福康

安在京時卽聞達賴喇嘛木訥無能過於誠實

不特巴忠所言如此凡曾至西藏之人無有稱

達賴喇嘛聰慧者及臣到藏時與之接見言語



之次極知感激

聖恩歡忭情形實屬至誠流露

臣

復宣示

聖主保護黃教輯寧衛藏之意令其辦理烏拉糧石

等項達賴喇嘛卽督率濟隴呼圖克圖及各呼

圖克圖大喇嘛噶布倫等添辦糧石帮出烏拉

極爲踴躍因軍營需用鉛藥砲位卽將布達拉

存貯火藥鉛子砲位全數交來

臣

等派員前赴

貢布等處試辦火藥需用硝筋達賴喇嘛聞知

卽將所有硝筋運往配製現因巴圖魯侍衛等

及索倫達呼爾兵丁需馬較多將來進勦時過

盡賊境險隘地勢稍平正資馬力馳驟

臣

在前

藏挑買好馬一百匹暨鄂輝所買馬匹尙恐不

敷更換西寧騎來馬匹趨程疲乏不能立時餒

養臚壯原擬在後藏添買馬數百匹因番民避



痘遠出零星居住派員採買恐致擾累復寄知  
達賴喇嘛及濟隴呼圖克圖商辦茲據覆稱前  
後藏地方可辦馬一千匹並遣人攜銀三萬兩  
赴青海蒙古番族地方買辦馬匹以供軍營進  
勦及凱旋時騎用可見達賴喇嘛感

恩圖報凡有交辦事件無不急公趨事並非不曉事  
務者可比卽前次廓爾喀滋事時達賴喇嘛以

巴忠及丹津班珠爾所辦冒昧不應許銀贖地  
達賴喇嘛之意以賊匪貪狡無厭若不示以懲  
創恐有反覆所見甚正曾經據實具奏<sub>臣</sub>復聞

達賴喇嘛言及巴忠過藏時勸令進勦並云我  
是出家人原不應力勸進兵傷害生靈但因廓  
爾喀不信佛法意在欺凌恐黃教從此衰微所  
以力主進兵除去邊患方可保全黃教等語細



加詢訪藏內人等皆言達賴喇嘛實有此語是此言尙在許銀說和之前並非因商上給銀意存吝惜始行阻止且丹津班珠爾等許給銀兩辦定後稟明達賴喇嘛當將銀兩給還及藏內未將次年銀兩付給廓爾喀不允達賴喇嘛以此事終非了局恐滋事端復派堪布喇嘛托格穆特等備帶元寶一百五十個前往講論撤回

合同永斷葛勝亦係商上給發並無靳惜之意從前不願說和之說尙非爲財物起見卽如屯練兵丁皆係深信佛教各兵一到前藏卽叩謁達賴喇嘛當經達賴喇嘛傳令一一進見爲其跋涉遠來用好言撫慰每兵各給銀一兩昨據岱森保稟報索倫兵丁三百名行抵前藏帶領至布達拉叩見時達賴喇嘛以索倫兵丁調來



更屬遙遠又按名給銀一兩護身佛一尊彰噶  
一個阿幾蘇一包達賴喇嘛因此次蒙

恩派兵前來保護西藏僧俗逐名給與銀兩連後起

索倫屯土各兵計算所費亦及八千餘金外番

素習雖多見小然自臣到藏後屢向達賴喇嘛

敬宣

聖訓佛法以虛無爲宗施捨爲重財帛貨幣皆身外

之物不容慳守達賴喇嘛敬聆之下頗能領會

是以臣每次布施俱以自備物件從優送給而

達賴喇嘛送臣之物除銅佛藏香外其餘概不

收受達賴喇嘛知臣勸勵之意凡遇採買牛馬

辦糧犒兵等事需用銀兩從不稍存吝惜臣詳

察達賴喇嘛爲人明白賦性真誠心有計畫藏

而不露惟相貌實屬不揚言語稍覺遲鈍外人



不知底裏遽以爲老實無能品評殊爲失當

臣

自到藏以來隨時留心體察衆論竟不足憑

臣

查唐古忒番民本屬軟弱又因久享昇平從未

經事一遇賊匪怯懦張皇不能抵禦前聞藏內

派調出兵應役番民退縮不前又風聞堪布喇

嘛羅卜藏根敦自達賴喇嘛幼年跟隨至今最

爲達賴喇嘛信任管事聲名頗屬平常

臣

抵藏

後卽向達賴喇嘛濟隴呼圖克圖等反覆剴切

開導告以此次大兵進剿全爲輯寧藏地軍興

所需悉皆優給價值毫不累及番民屢次詳述

聖恩多方鼓勵並傳見羅卜藏根敦觀其人頗有才

具本係可與爲善之人隨卽宣布

聖主恩威明示賞罰嚴行駕馭並向達賴喇嘛詳悉

告知達賴喇嘛感激



天恩矢誠報効督率衆喇嘛認真辦事羅卜藏根敦  
自經<sub>臣</sub>飭諭之後尤爲奮勉事事認真出力番  
目番民亦皆知所激勸力改疲玩積習挑派番  
兵時並有自告奮勇者看此情形達賴喇嘛尙  
知感戴

恩慈率領衆喇嘛及唐古忒人等加以振作其非魯  
鈍無能卽此可証又如藏內商賈貿易向來達

賴喇嘛及管事喇嘛噶布倫等置買物件多占  
便宜<sub>臣</sub>在前藏時因行李未到將

恩賞銀兩買辦備賞之物俱照時價從優給與俾沾  
餘潤達賴喇嘛聞知亦卽公平交易並令管事  
喇嘛及噶布倫等不得賤價買物衆皆遵奉約  
束積弊頓除商賈等無不感悅可見唐古忒人  
等見小貪利習氣並非不可化誨而達賴喇嘛



竟能身先表率留心整飭尙屬能知大體奏入  
上諭內閣曰福康安奏達賴喇嘛感激朕恩將現在  
進兵應需口糧馬匹火藥等項竭力捐辦且索倫  
屯練各兵丁到藏俱分別贈給銀兩等件朕甚爲  
欣慰著加恩賞達賴喇嘛哈達一條珍珠串一掛  
以示優獎達賴喇嘛嗣後於進剿廓爾喀事宜益  
當實心報効以期迅速成功

閏四月初六日

戊申

上命軍機大臣傳諭福康安海蘭察惠齡曰此時岱  
森保等計已行抵後藏烏什哈達所帶索倫兵丁  
及其餘屯土各兵亦當陸續踵至福康安等現在  
自必統率大兵相機進剿但喇特納巴都爾及巴  
都爾薩野先經鄂輝等檄諭復經福康安發檄誘  
降賊匪接奉兩次檄諭後何以竟不差人稟覆若



非賊人自恃險遠不知畏懼官兵抑係因濟隴一帶之賊日久未見官兵進剿陽布相距更遠大兵一時未必遽能直搗巢穴或疑福康安等亦不過與鄂輝等伎倆相同不敢深入屯留邊界意存和息將就了事敢為此遲延觀望之計亦未可定福康安惟當遵照節次所降諭旨先將濟隴絨轄兩處之賊剿滅淨盡廓清邊界使大兵深入免致後

顧之虞至濟隴係通賊境大路賊匪在彼屯聚者較多節據福康安等奏賊人又於該處添設木柵為固守之計福康安等統領大兵自當由此一路攻剿淨盡其絨轄一路之賊雖少亦不可不分兵撲滅以防間出滋擾著令台斐英阿幫同成德帶兵二三千名前往絨轄將該處賊匪一併殲戮無遺方為妥善若可兩路進攻以分賊勢亦佳總在



相機而行也

初七日

乙亥

福康安海蘭察惠齡奏言

臣

等節次

詢問賊情知廓爾喀道途險隘賊中如巴都爾薩野沙瑪爾巴瑪木薩野等譎詐之人主謀唆使早將濟隴擦木隘口砌卡築牆添賊拒守復據成德探報絨轄一路亦經添砌寨房樹立木城以爲負嵎固守之計是賊匪聞知大兵進剿

各處早有準備將來攻至巢穴賊匪較多更必須出奇制勝方能迅速戡事是以將濟隴絨轄兩處暫緩進剿遵照前奉

諭旨姑以檄諭誘降一俟大兵到齊卽行剿平濟隴迅搗賊巢若濟隴不能立時攻破亦卽繞道截其歸路一面帶兵徑趨賊巢賊匪見兵行神速猝不及防自必心驚膽落無暇守禦大兵一到



或可迅奏蕩平萬一賊匪憑城固守急切不能  
攻克誠如

聖諭必致稽延時日徒勞兵力且聞該處城垣週圍  
約有數十里城門較多亦不能處處派兵攻圍  
或應遵

旨故留一路使之逃逸官兵於要隘地方潛爲設伏  
乘勢截拏勦殺更爲事半功倍容<sub>臣</sub>等臨時相

機妥辦其聶拉木等處鄂輝等派駐之兵零星  
分佈未免兵分力薄<sub>臣</sub>等已扎知鄂輝等酌量

撤出以爲進勦之用將來攻勦賊巢以前調之  
兵併力直前其後路接應兵丁有續行請調川  
省綠營屯兵三千名五月中卽可到來以供調  
遣若到賊境後再由內地調派兵丁至近亦在  
川滇兩省實恐緩不濟急似毋庸再行添調致



滋糜費再查附近賊境各部落雖與賊匪為讐  
但總畏賊匪強梁不敢公然與之為難作木朗  
哲孟雄宗木各外番部落已藉來藏大兵聲勢  
與賊打仗及攻至賊境仍復頓兵不進互相觀  
望其布魯克巴部落與哲孟雄宗木俱接賊境  
前經<sub>臣</sub>等發給檄諭令其發兵協勦並令副將  
達音泰前往察看如該部落果能發兵該副將  
卽就近帶領前赴賊境茲據布魯克巴額爾德  
尼第巴稟稱布魯克巴地方與廓爾喀接壤隘  
口甚多我部落久受

大皇帝重恩常思報効又恨廓爾喀不奉黃教一聞  
大兵進勦卽派所有番兵分佈各處交界隘口  
堵禦賊匪逃竄之路此時現存番兵有限難以  
再派出征若賊首賊目逃來卽當盡數拏送斷



不敢容留隱匿

臣

等詳察布魯克巴來稟語意

尙知恭順

天朝截拏賊匪但所稱堵截各處交界隘口已派多  
兵現存兵力較少之語亦係畏怯賊勢不敢遽  
至賊境進攻若將來大兵乘勝深入賊勢旣衰  
之後各部落自必紛紛響應我兵未進之先恐  
不能恃以集事

臣

等查此次進勦廓爾喀曉諭

附近各部落不過豫截賊匪逃竄之路原不藉

外番兵力始能滅賊今布魯克巴祇派兵堵截

隘口未卽越境攻賊若再強令助兵恐外夷以

天朝賴伊兵力轉致啟其輕視之心

臣

等再四酌商

已發檄諭知布魯克巴以爾部落地方褊小除

添兵守隘之外兵力自屬不敷大兵聲威壯盛

滅賊在卽毋須爾發兵協勦惟當嚴守要隘堵



挈賊匪以邀重賞若賊匪由爾處逃竄定將爾  
部落一併勦滅如此嚴切檄諭諒布魯克巴地  
方斷不敢縱容逸賊所有<sub>臣</sub>等派往督令發兵  
之副將達音泰已卽飭令仍回軍營

福康安又奏言前經<sub>臣</sub>等查出丹津班珠爾之  
跟役色角七哩帶回家信並無圖記恐另帶有  
真實家信與賊匪勾通私語奉

旨令<sub>臣</sub>嚴密查辦<sub>臣</sub>查班第達丹津班珠爾在藏管

事年久族屬較大近日又聞丹津班珠爾之妻  
卽係沙瑪爾巴姪女恐有勾結情事時時留心  
防範密加訪察因知班第達丹津班珠爾平日  
辦事不公番民嘖有煩言心懷不服斷不致爲  
其煽惑雖丹津班珠爾久在藏中與沙瑪爾巴  
串通一氣班第達舐犢情殷私通信息皆屬事



之所有但班第達受

恩數十餘年素仰

天朝法制嚴明尙知感畏近年已經退閒疾病纏綿  
竟成殘廢卽思搖惑人心亦不敢逞其伎倆現  
在大兵漸次到來邊界隘口堵截嚴密亦不容  
班第達等往來通信至前後藏番民原有畏難  
疲玩積習自臣到藏以來宣示

聖恩多方鼓勵均各感激奮興辦理糧運烏拉等項

不敢推諉貽悞卽可爲不被煽惑之明証且臣

在前藏時班第達會屢次昇病來見畏懼情形

現於辭色臣遵

旨用好言撫慰隨時駕馭伊亦極爲感激此時詳察  
藏地情形可保必無他慮惟是色角七哩所帶  
丹津班珠爾家信何以未用圖記其中情弊應



金史卷之八十八 卷二十八  
即確切查明而查辦此事又須慎密辦理不便  
稍露聲色道員林僑人尙細心昨經臣派赴前  
藏查催軍需糧運現已遵

旨札知該道就近密查一俟稟覆到日卽行據實覆  
奏再喇特納巴都爾與鄂輝等稟帖內稱從前扎  
什倫布辦事的人說過後來如不依合同你們  
儘管到扎什倫布來等語前據鄂輝等咨送譯

出稟帖前來

臣

卽以賊匪狡黠藉詞歸咎藏內

以見其並非無端構釁其言難以盡信及至後  
藏確加詢訪皆不知有此語但其稟內明言當  
時寫有字據或竟係丹津班珠爾與賊匪私立  
合同內原有此語亦未可定俟拏出丹津班珠  
爾時詳加嚴訊方可得實均奏入

上命軍機大臣傳諭福康安海蘭察惠齡曰前此福



康安奏到檄諭賊匪附近各部落併力勦賊一節  
朕卽以辦理太早今據奏作木朗哲孟雄宗木各  
部落俱各觀望不進而布魯克巴回覆之稟以番  
兵分佈各隘口現存兵力有限難以再派出征亦  
不免心懷畏怯此係自然之勢廓爾喀附近各部  
落平日被賊匪欺凌伊等若見我兵乘勝深入自  
必紛紛響應藉以報復私讐搶還侵地今大兵尙

未進勦各該部落或慮誑誘伊等與賊接仗而官  
兵倘如前次不進將來必受賊匪荼毒且伊等兵  
力本屬有限誰肯先與賊匪爲難福康安等惟當  
俟大兵齊集將濟隴屯聚賊匪一鼓殲擒卽乘兵  
威壯盛直搗陽布賊巢其時附近各部落等自必  
聞風響應可成破竹之勢現在濟隴賊匪諒非勁  
敵福康安等帶領如許生力勁兵鼓勇進攻斷無



不破之理自應先得此地再圖進取方為正辦至  
繞道截其歸路徑取賊巢之計究非穩著該處山  
路叢雜萬一我兵首尾不能兼顧關係匪輕節經  
降旨甚明想福康安等接奉後自必熟籌盡善先  
將濟隴賊匪剿戮淨盡再行統兵深入併力攻搗  
賊巢一舉集事其緘轄一路賊匪無多即遵照前  
旨派令台斐英阿幫同成德帶兵二三千名分投

前往儘足以資撲滅又據奏丹津班珠爾之妻即  
係沙瑪爾巴姪女恐有勾結情事此最應留心前  
此丹津班珠爾赴邊界講和即係賊匪指名令伊  
前往定議甫經到彼即被裹去安知非沙瑪爾巴  
與丹津班珠爾勾連一氣做成圈套否則丹津巴  
珠爾隨帶多人何至被伊誑騙裹去且丹津班珠  
爾上次向廓爾喀許銀和息並非丹津班珠爾白



出已資卽此次攜帶銀兩前往備用皆係達賴喇嘛商上之物伊從中說合現雖羈留賊地將來事定仍可坐享厚貲故屢次所寄稟帖大率爲賊匪緩頰卽其家信內曾有被賊羈留受苦懇其父用銀贖回之語自係仍用達賴喇嘛商上銀兩看來此事全係丹津班珠爾與沙瑪爾巴互相勾結狼狽爲奸亟應加意防範雖據福康安等訪知丹津

班珠爾及其父班第達平日辦事不公番民嘖有煩言斷不至爲其煽惑但丹津班珠爾與沙瑪爾巴旣屬姻戚且久居賊中居心狡詐將來挈獲時畧加訊問卽於巴圖魯侍衛章京內慎選妥員迅速解京不可令與伊父班第達及家屬見面私通信息此爲最要至福康安前此奏請添兵三千後又有旨令孫士毅再備兵三千聽候調用其應否



需調之處並著福康安酌量行止

同日福康安又奏言前鄂輝等奏攻克聶拉木官寨帶兵出力人員奉

旨令

臣

覆查具奏查聶拉木官寨險固賊匪併力拒

守經滿漢官弁及屯土弁兵奮勇攻撲堵截各

處隘口於上年十二月二十八日本年正月初

二初八十六等日連次打仗擒殺賊目賊匪開

挖地道燒燬賊糧至正月二十四日轟塌寨房

賊匪悉就殲擒雖鄂輝成德調度未妥辦理遲

延而侍衛官弁兵丁等實屬奮勇出力查閱鄂

輝成德單開滿漢官九員滿兵一名巴塘副土

司及降番屯練備弁十三員均屬在事出力尙

無冒濫該員弁等多係

臣

所素知之人今

臣

復

詳悉認真查察核其勞績量爲刪減以昭公當



內除遊擊張占魁前經奉

旨記名以叅將陞用應毋庸議外驍騎校塔清阿阿  
朗阿把總劉永清雖屬奮勉但較張占魁等出  
力稍次此時毋庸陞等賞翎其都司什格蒲益  
章請賞花翎巴塘土舍策旺諾爾布巴塘行營  
土外委阿扎請賞藍翎俱未免稍優應請將什  
格蒲益章二員賞戴藍翎策旺諾爾布阿扎二

員各賞緞一疋已足示獎其餘滿漢官三員滿  
兵一名巴塘副土司及降番屯練備弁十一員  
及拔補出力綠營屯土弁兵等請仍照鄂輝成  
德原奏分別獎擢奏入

上諭內閣曰前據鄂輝等奏請將攻勦聶拉木官寨  
賊匪在事出力人員分別獎賞一摺人數過多恐  
不無冒濫等事當經降旨福康安查明實在出力



金定廣西... 卷二十八  
者據實具奏以昭公當茲據福康安查奏前次聶  
拉木官寨據守賊匪經官兵攻撲堵截悉就殲擒  
侍衛官兵等實屬奮勇出力除遊擊張占魁業經  
奉旨以叅將陞用應毋庸議驍騎校塔清阿阿朗  
阿把總劉永清出力稍次此時無庸陞賞外其餘  
員弁兵丁仍請分別獎擢等語著照所請都司張  
志林千總尤漢玉俱著加一等陞用副都司成勒

春丕勒著賞給匝勒丹巴圖魯名號土都司都魯  
斯達拉著賞給喀達布巴圖魯名號土守備生根  
著賞給碩克巴巴圖魯名號仍照例各賞銀一百  
兩屯千總阿庫守備申扎朋俱著賞戴花翎都司  
什格蒲益章候補守備馬登朝兵丁崇喜行營都  
司雍忠拆里守備阿咱納千總肯朋阿凱木賴把  
總楊忠俱著賞戴藍翎土舍策旺諾爾布土外委



欽定四庫全書 卷二十八  
阿扎著各賞緞一匹以示鼓勵

同日和琳奏言臣前過川省時面晤孫士毅卽

詢以現在運送一切軍需數目及沿途各站辦

理烏拉情形據孫士毅逐款相告並將添派文

武職名撥運軍裝火藥錢糧各數目開單移送

前來臣出口後留心稽察見牛馬馱載人夫背

送者絡繹不絕於道一面催令趕緊行走並接

見護送員弁及臺站糧員問以牛馬人夫背馱

輕重每日行程若干如何更換烏拉不致耽擱

之處據稱牛馬皆係各土司營官備辦照例給

價自去秋至今來往日久率多疲乏故亦間用

人夫背運每二名抵牛馬一匹經孫署督飭令

設法籌備不時委員查催現有烏拉皆係奉文

添辦計人夫日行二三十里不等牛馬日行四



五十里不等且每起軍需不能一齊到臺須等  
待齊集方可發給烏拉各等語查自打箭爐至  
前藏五千餘里似此行走勢須四月餘方能抵  
藏現在福康安等正當領兵深入尅期擒賊之  
時雖藏內已有火藥鉛彈運至後藏尙不致缺  
乏但軍火錢糧寧可有餘不容稍有不足今復  
奉

恩旨將前藏以東臺站烏拉交

臣

督率統理

臣

前會

與孫士毅札商意欲嚴立章程以專責任今自  
藏界南墩以西經福康安與達賴喇嘛等札商  
作爲五十四站每站添牛三百隻受雇照例給  
與價直自可較前加速然以臣耳目所及現在  
情形若牛馬僅行四五十里卽每站再有三百  
隻亦難期迅速莫若立定期限險阻之區每日



限行八十里平坡之路每日限行九十里凡一起軍需到站不必俟其齊集各臺文員立即分派烏拉武職撥兵護送隨到隨行下站查明時日折算限期如有認真出力於限內多趕里數者或有催趨不力違逾限期者俱責令總理臺站道府據實查明申報<sub>臣</sub>等分別獎賞枷責設各臺員辦給烏拉通融攬用人夫解員能為驅

使亦照牛馬期限當所不禁或竟有違限過多一經查出除微末員弁從嚴究辦外其沿途總理道府副叅遊擊等員亦應一併嚴叅治罪本日接據巴塘稟報有運送火藥鉛丸弓箭三起委員到站皆係人夫背運尚未到齊等語<sub>臣</sub>因立法之初卽此可以試驗必得親身經理竹巴籠距巴塘九十餘里當卽馳回率領臺員將備



將先到者分載催行嚴諭委員務須按限行走  
 並飛飭前途臺站一體遵照辦理臣隨路查察  
 自可驗其勤惰因見巴塘土司吹忠扎布告以  
 西藏所屬喇嘛第巴等現在添辦牛隻之事該  
 土司自稱久受

國恩常思報効懇請多方搜覓亦照西藏所屬除現  
 備烏拉之外情願添備三百隻伺候受僱臣卽

面加褒獎從優賞資臣思巴塘土司既可勸勉  
 從公裏塘明正兩司亦同一例孫士毅現在爐  
 城當將辦理各緣由飛咨該督想孫士毅急公  
 更事自必益臻妥協

和琳又奏言臣於本月十七日自巴塘起程行  
 抵公拉地方適遇扎薩克喇嘛噶爾桑丹吉等  
 解到竊臣出京時恭請



聖訓經

皇上看出鄂輝等所譯丹津班珠爾家信二封並無圖記或另有蓋用圖記之信寄回家內鄂輝等為其所愚卽丹津班珠爾信內所稱前此扎薩克喇嘛回藏帶去之信因路上患病一併燒燬之語亦恐藉詞掩飾

諭令福康安留心確查並令臣一體詳察茲適途遇

該喇嘛臣卽將燒燬書信一節向其訊問據稱

中途患病屬實至今未曾全愈自廓爾喀帶回書信亦實有四封係丹津班珠爾稟達賴喇嘛一封給衆噶布倫一封班第達家信一封玉托

噶布倫家信一封俱於去年十二月初九日交

給鄂大人臣復詰以丹津班珠爾身邊帶有圖

記聞被廓爾喀搜去你所帶四封信內是否印



有圖記復據供我帶回四封書信皆有圖記等  
詔<sup>臣</sup>思前經

聖明指出無圖記書信係跟役色角七里寄出者是  
以信內有前此扎薩克喇嘛害病連書信都燒  
了之語今噶爾桑丹吉等所供帶回書信未曾  
燒燬於去年十二月已經交給鄂輝且係四封  
數目亦不符合不知鄂輝等譯出進

呈者卽係噶爾桑丹吉所帶抑係色角七里等所

帶<sup>臣</sup>於途次亦不能詳細究問已飛咨福康安

詳悉查對的實統容<sup>臣</sup>赴前藏再當嚴密訪察  
另行

奏報再查看噶爾桑丹吉布爾泰二人言語神情  
率多閃爍且在賊境與丹津班珠爾玉托噶布  
倫一同居住今獨放此二人回藏據供並有護



送之人難保不與沙瑪爾巴巴都爾薩野等狼  
狽爲奸不日押解爲是一經研訊自不難水落  
石出均奏入

上命軍機大臣傳諭和琳孫士毅曰軍火錢糧關係  
緊要今經和琳酌立限期分別懲賞自可期迅速  
無悞但口外烏拉俱係各該處土司出派受雇與  
內地民夫情形不同內地民人運送糧餉等項尙

有臨時觀望不聽約束者何況此等土民本屬野  
性難馴若過於嚴緊或致躲避不前並別滋事端  
轉爲未妥自應善爲招集酌加獎賞然賞賚亦當  
有節制不可過優倘過於優厚伊等貪得無厭不  
特難乎爲繼且不足以見恩於事轉屬無益著傳  
諭和琳孫士毅一體留心妥協經理賞罰得當務  
使土民等知所懲勸聞風爭赴以期軍火錢糧源



源接濟不致遲逾滋事方爲妥善至巴塘土司吹  
忠扎布請照西藏所屬於現在烏拉之外添備三  
百隻伺候受雇該土司急公報効殊屬可嘉業經  
和琳獎賞著孫士毅再傳旨賞給大緞二匹以示  
鼓勵又據和琳奏查訊解京之扎薩克喇嘛前此  
丹津班珠爾帶回家信一節據供我帶回四封書  
信俱有圖記等語鄂輝等呈進各書信內有丹津

班珠爾玉托噶布倫二人家信未用圖記恐有改  
換情弊是以諭令查明具奏今據扎薩克喇嘛供  
所帶書信俱有圖記因思前此鄂輝等呈進書信  
其有圖記者俱係蓋用封面之上其丹津班珠爾  
玉托噶布倫二人家信俱無封面或係鄂輝等於  
呈出時先行開看將此二信封面拆去是以並無  
圖記亦或另有別情均未可定現在福康安正在



進兵勦賊此等事務毋庸交伊查辦致令分心鄂  
輝督催糧餉往來巡查著和琳於鄂輝到前藏時  
面爲嚴切詢問據實具奏

欽定廓爾喀紀畧卷二十八



程